



Prins Stefan I Prinses Anita

Mèt dees daag gaon wae
neet skie-je
Mer blieve wae hie de
baer rie-je

Vastelaovundj 2004

Jeugdprins Lex Jeugdprinses Wendy

Laotj de muziek dit jaor
mer knalle
Want wae gaon flink
fieëste mèt z'n alle!!



PROKLAMASIE VAN PRINS STEFAN I

Ich, Stefan I, 53ste prins vanne Moerebuuk, geboore in Wieërt en groeët gewoore in Ell
 Zoon van Theo en Netty, aojer broor van Jeroen
 Same woeëndj met mien Prinses Anita oppe Breeven in ut Spargelheukske
 Werkzaam als administratief medewerker bie Jac Eyck Verf in Wieërt
 Voetballer bie RKESV, woeëdet ich auch meenig flieëstje regel
 Gaon erg gaer skie-je, helaas neet eeder jaor
 Al hieël wat jaore leider van ut Kinjervakantiewerk en Jeugdwerk Ell
 Bin vaak te vinje in de Eller kaffees
 En houj net wie veul van mien veurgangers van ein lekker glaeske beer en stomme kal

Bie de gratie vanne Raod van Elf, laot ich uch weete:

Als noewe prins van ut Moerelandj
 Laup ich veurop en blief zeker neet
 aanne kantj

Zoeë-as de meeste waal weite,
 duit mien prinses Anita volleyballe
 Letj dus mer goot op,
 want met dees daag laote wae ut flink
 knalle

Doon ich det neet in mien
 scheidsrechtspak, wielertenu of mèt
 de doedelzak
 Mer zoeë-as ut huurtj,
 mer ein groete moer in ein prinsepak

In de orde van de skihut, vraag ich
 eederein flink mèt te doen
 Neet op kloompe, laarze of gympies,
 mer geweun in ein paar ski-sjoon

Geit de Raod neet te voet van kaffee
 tot kaffee
 Mer waere ze gebrachtj
 In zoeën groeëte gezellige arrenslee

Om den ein bietje in dae sfeer te
 kômme, dae is namelik uniek
 Roop ich eederein op, dreidj neet allein
 carnavalsplaten mer auch geregeldj
 après-ski muziek

Geit RKESV I weer veur eine periode en
 weurdj ut tweeëdj missien kampioen
 Als prins probeer ich ut net zoeë good te
 doen, neet allein, mer mèt mien
 adjudanten Jeroen en Jeroen

Ein mobieltje hûb ich neet,
 die luuj zeen bliekbaar op eine handj te
 telle

Hubjer mich echter nuudig, den kindjer
 mien adjudanten daag en nacht sms-se
 of belle

Net wie veurig jaor en al die anger kiere
 Zullen we auch dit jaor de receptie in
 deze zaal gaon viere

Wins ich jeugdprins Lex en jeugdprinses
 Wendy
 veul lol en plezeer
 Dootj det met eine cola of sinas
 mer nog neet met ein glaas beer

Veur eederein dae nog neet waetj welk
 thema hae met de optocht môt pakke
 Kan mien motto bie uch missien de
 knaup doorhakke



MET DEES DAAG GAON WAE NEET SKIE-JE MER BLIEVE WAE HIE DE BAER RIE-JE




En den bèsse prins.

Al verschillendje jaore tippe ze mich as noewe prins vanne Moerebuuk. De letste jaore hie in Ell en ein jaor of 5-6 geleeje al in Swartbrook, wie det ich dao voetbaldje. Dao in Swartbrook was Frans vanne Bûs toen trainer. En zoeë-as de meeste van uch waal weite, is det auch ein lid van ut prinsecomité, het grupke det eeder jaor eine noewe prins mot zeen te vinje. Ich hûb Frans toen geregeld gezagd det ich der toen nog neet zoeë op stong te springen om prins te waere, mer det ich ut waal ins zoj wille waere. De rede hievan waas, det ich miene vastelaovondj zelf woej indeile en neet afhankelijk wilde zeen van de verplichtingen die eine prins heet. En Frans dae zelf auch 2 kandidaat prinse als zoon heet snapjde det. Noeë zuldjer missien waal dinke waat duit dae Stefan den zoe al met die daag. Bie deze ein kleine oetleg. Op zaoterdigmiddig zaalvoetballe in Rooij en inne kanten ein paar oor biekalle euver dae onbelangrijke wedstrieëd. Om ein oor of negen 's-aoes terük nao Ell, om den met eigelik al veul te veul beer op aane carnaval te beginne. 's-Nachts laat aane koei-j. Zunjigsmiddig weer oppe tieëd paraat, om met ein man of twintig nao Rooij te gaon. Neet veur de optocht, mer om de gezelligheid in ein plaatselikke kroeg. 's-Aoves om 10 oor nao Wieërt, om get te aete. Eigelik waas ut verstaeniger om heives te gaon, mer jae, dich zuls mer ins get misse. Den de maandig, dae daag waas gehieël afhankelijk van wie good desse de daag dao veur gegaete haats. Soms woorse om 8 oor al weer toeës nao 4 glaze water 6 spa roeëd en 2 kleine pilskes en unne anger kiere waerdje ut weer geweun ein oor of 3 's-nachts. Dinsdig nao Haler, dao waal veur de optocht, Anita is namelik van Haler. Later oppe middig terug nao Ell veur ut indj vanne jeugdboorebroeloft en ut ontbinje vanne prins dae aovondj. Op zoeën meneer carnaval veere is naturelik neet hielemaal volgens de regels vanne Moerebuuk, vandao det ut comité mich in die jaore links leet ligge. Eigelik is miene vastelaovondj nog precies wie 5 jaor terük. Mer toch waas ut ein kwestie van wachte op die eine vraag vanoet ut comité. En jaowaal hê, de zaoterdig nao Ell kermis, dao kwoom Frans. Ich waas boete aan ut sjoeffele en omdet ich ziene buurman bin veul ut neet op waoëdet hae veur kwoom. Moog ich dich get vraoge zeet hae! Ich wis geliek waat detter woej vraoge. En inderdaad, "Stefan wilse dit jaor Prins waere?". Ondanks det ich de vraag waal haai verwacht môst ich toch lache. Nao get euverleg met Anita en enige oetleg van Frans en Evert euver ut hieële wel en wee, hup ich jao gezagtj. Want ze vraoge dich tenslotte toch mer eine kier. Den begintj ut wachte, en tijdens det lange wachte auch nog uns ut prins-raoje. En det is versjrikkelik. In ut begin ging ut nog good, mer die letste onger half weak waas versjrikkelik. Ich waas de letste jaore toch al eine veul veurkômmdje naam inne pool, mer dit jaor haaj ich op un gegaewe moment ut idee det hieël Ell ut al wist. Ut enigste desse den wils, is ut geweun bekindj make. Det hub ich den toch mer neet gedaon, mer ich waas blie det ich aafgelaupen zunig die muts en dae skibril van miene kop mocht doen. Noeë bin ich den echt de 53e prins van ut Moerelandj en hûb ich der herstikke veul zin. Ich gaon probere om samen mèt mien prinses Anita en adjudanten Jeroen en Jeroen der eine gezellige carnaval van te make. Ich sloet noe aaf met mien devies.

MET DEES DAAG GAON WAE NEET SKIE-JE
 MER BLIEVE WAE HIE DE BAER RIE-JE

advertensie



Is-der get neet in orde
met eur kat of eure hondj
Snel nao de dierenkliniek
want dao make-ze die
weer gezondj



Sjoeënhedsspecialiste

Jeanne v/d Hagen

As gae der nog knapper oet wiltj zeen.

AUTO I

Anja heet de auto gelieëndj van Linda veur snachs te gaon wirke in Helmundj. Smûrges waas dae auto bevrore en Anja kreeg de deur mer neet ope. Ze ging toen door de achterdeur inne auto, stardje-hum en ging weer door die achterdeur droet. Geliek wie ze de deur weer toe goeëdj sjoet de centrale vergrendeling toe. Dae auto leep dus mèt de sleutels der op en alle deure toe waat noe gedaon? Anja wist gein anger oplossing den de wegewacht te belle. Binne 10 minute wore-ze al dao en haje dae auto zoeë ope. Allein môst Anja lid waere vanne wegewacht en drek 175 euro betale. Noe waas Anja lid vanne wegewacht mer haaj zelf nog geine auto.

Geine auto mer
rieje kan ich !




Weurdje vanne Vorst

De jaore gaon snel. In 2004 gaon ich veur ut 22^{ste} jaor met as vorst. 2 x 11 Jaor gevûldj mèt prinseballen, prinserecepties, Bôntje Aovendje, senioremiddige, messe, sleuteleuverdrachte, optochte en eine houp recepties en anger activiteite. Dao steis-se toch ônwillekeurig efkes bie stil. Doe steis veural stil bie de vraag: met weem hûbse det gedaon, met welke prinse, prinsesse, muzikante, mer veural auch welke minse inne Raod? Sômmige wore-der al wie ich begos, van ein aantal leje hûbbe wae noeëdgedwonge aafsjeid môtte numme. Veul knôtsgekke momente hûbbe wae mêtgemaaktj, te veul ôm allemaol op te numme. Veural inne jaore tachtig toen veul mieër mocht en kos (de prinsewage op ut ieës vanne viever). Eine houp fantastische momente, eder jaor opnoew met al oos activiteite. Ut kônstante succes van oos Bôntje Aovendje, optocht, prinserecepties en veural de lêste jaore auch de shows met Prinsebal. En noe op dit moment: ut enorme enthoesiasme vanne jeugd. As ich zoeë trûkkiek, loupe der toch get rillinge euver de rûk, môt ich zègge. Veul herinneringe kômme op, herinneringe aan ein geweldige vereniging in ein machtig fein dûrp. Herinneringe aan veul fieëste, mer auch aan deep leid waat wae binne oos vereniging door de jaore mêtgemaaktj hûbbe. Moerebuuk, ich hûb dao mer ein weurdje veur: danke. Danke det gae mich dees functie laotj doon, en veural danke det gae ôs vereniging altieëd zoeë geweldig gesteundj hûbtj: Raod en dames, muzikante, artieste ... en veural auch gae, alle Moerebuuk van Ell. Blijftj allemaol de vastelaovendj oetdrage wie det gae det noe dootj. Det is good veur de vastelaovendj! Det is good veur alle, mer den auch alle minse van Ell!

Vorst Jan

Bèste Jan,



Alvast eine dikke Prefisiat

Names alle Moeëre en Moeërinnekes

advertensie

Reperaties,
autoos,
tweëdjehands
of noew,



Gaotj nao
Garage
Heemels
toe



LAST VANNE VEUT ?

Den snel nao
pedicure Bep
van Oosterhout-Tobben

Helm nueëdig?

De term "voetbal is oorlog" is in ut verleje oeëts gebroektj door eine bekindje Nederlandse trainer. Auch as-se allewiel nao ut voetballe geist kieke den hûb-se dèk ut gevoel det de speulers in ut veldj dae term mer al te lëtterlik op wille pakke. Ze laupe nog net neet rônjdj in seldaotepak mèt helm op anges zôt-se dinke ... Veur de toesjouwers zoj ut missien waal veiliger zeen ôm mèt eine helm op nao ut voetballe te gaon kieke. Ankie Kessels, vaste


supporter van ut ieërste (F-side), kan det weite want ze heet eine kieër eine voltrefter oppe kop môtte inkassere wie ein van die voetballers de bal keihel wèg sjoet. Ze waas good dul en kos der gelûkkig later weer mèt lache ... mer ... de volgendje kieër toch mer in de laupgrave??

Pas op want
ich sjeet trûk



Bekeuring 1

Jeroen Custers is geslaagd veur zien riebewies. Veur edere jônge jông eine meilpaol en veur de aojers get òm grueëts op te zeen. Same mèt mam Maria gaon-ze nao Hunsel òm det rós pepeerke op te hole. Mam waas auch blie en reej stevig door in heur eige autoke nao ut gemeindjehoes. Det riebewies waas snel geregeldj en vol trots mocht Jeroen van mam heives rieje. Mer oppe trûkweeg, gae raadj ut al, steit de pliesie te controlere. Jeroen haaj dao gein ervaring mèt want det haaj-der mèt lesse auch noeëts geoeffendj. Dus in eine kieër eine groeëte **flits** ! Nao 5 minute zien



vroem vroem

riebewies te hûbbe (det is òngevieër 2 kilemaeter) haaj Jeroen drek ein bôn aanne bôks want hae reej 110 km/or. Ein absoluut recor, mer of pap en mam dao zoeë grueëts op wore?



advertensie

BOEFIE

Dé specialist
in kinjerkleijing



Gaotj-der ins get dèkker op oet
Beveurbieëldj nao
De Prairie
ofwaal
Bie Paul en Marlies



Ut-is al goud
wat blinktj bie

Gold Comer
Juwelen

De derby tege Rooj



Ut voetballe van ut ièerste woej mer neet lûkke wie veurig jaor. Ederein deej zien stinkendje bèst mer de resultate wore neet naomenantj. Tege Rooj hoofdje de trainer nemes te motiveren want dit waas eine derby. Piet Broens, de slechter van Rooj dae dao in ut bestuur zitj, zag veur de wêdstried tege ôze veurzitter, 'vandaag duje wae uch nog deper in ut moeras'. Det haaj-der neet môtte zègge want det wirkdje wie dae bekindje lap op dae stier. Wae kwome op 1-0 door Sjors (eindelik) en veur de rûst op 2-0 door Fred. Ut weurdj oeteindelik 3-2 veur RKESV door nog ein goal van Geertje. Groeët fieëst in ut kleidlokaal behalve veur Bas, dae vlookdje en sakkerdje. Potverd waat is det k.. Jochem gaaf ein runtje òmdet-ter jaorig waas gewaest en Ronnie zông van zigge zagge. Sjeitj ins oet mèt det gek doen zeet Bas, dae sjeits heet ôs 2 puntje door de naas geboortj. 'Jao mer Bas, wae hûbbe gewonne mèt 3-2, wae hûbbe 3 puntje!' 'Jao gae waal', zeet Bas. Hae begôs toen pas te beseffe det-ter ein gaol van Êll gemistj haaj. Hae meindje werkelijk det-se geliek haje gespeuldj. Waarsjienlik heet Bas mèt koppe eine bal verkieërdj gekrege en eine "black out" gatj. Dae haaj-der in eder geval waal wie-der snachs òm half ein nao Wieërt fietsdje want toen wist-ter nog neet mieër det-ter gevoetbaltj haaj.



Wage bouwe.

In Êll hûbbe wae eine groep De Brandjblûssers die gooj optochtwages kinne bouwe. Op ein gegaeve moment waerdje beslote òm mèt te doen aanne optocht in Wieërt. Det waerdje bekintj gemaaktj dus kwaam op ein gegaeve moment ein delegasie van ut comité vanne Rogstaekers effe kieke. Vreugtj ein van die minse, 'weije al hoe dèje euver ut spoor kotj met eure wage?' Nae, dao haje de Brandjblûssers nog neet euver naogedagj en vreugtj ein van die jônges, 'wie dootj-gae det?'. Zeet dae vanne Rogstaekers: 'jè, det is eigenlijk geheim, mer veur dieëze kieër vertelle vae uch det, vae bouwe de wages aanne angere kant van ut spoor ...!'




Kin-se Éll-s ; antjwoorde veurig jaor.

Inne rubriek "Kin-se Éll-s?" veule wae de minse in Éll aanne tandj euver Éller weurdjes die wae gelukkig nog gebroeke. Hie ônger de Nederlandse vertaling van veurig jaor waat auch de bedoeling waas. Auch de 'platte' vertaling van sommige is-ter weer bie ômdet ze zoeë sjoëen zeen verzône.

Ut weurdje Waat is / zeen ;	Nederlandse vertaling die wae bedoele	En wae bedoele ZEKER NEET dees vertalinge
Toese	Ruilen	Plastic zèk
Klotergeldj	Kleingeld	
Lueëter	Laatste waswater, werd vaak gebruikt om de nieuwe vuile was te wassen.	Bavaria
Ein Hekselkist	Kist waarin gehakseld stro wordt bewaard	Doodskist voor heksen
Dul	Draaierig	Vastelaovendj ôm twieë oor snachs
Ein wanmeule	Machine om kaf van het koren te scheiden	Een apparaat dat niet goed werkt
Ein waames	Decolité	
Intrintj	Ongeveer	
Eine bôngerd	Een boomgaard	Theike, Stephan en Jeroen
Heives	Naar huis.	
Ein krukèr	Een kruiwagen	Iemand die je helpt bij het vinden van een baan
Sjrot	(Grof) puin	Auto van Siem
Snammedaags	Namiddag	Familie van sangerdaags
Sangerdaags	De volgende dag	Familie van snammedaags
Seffes	Dadelijk, zo meteen	Alle Zef-fe
Swèrdjes	Doordeweeks	
Eine tesplak	Een zakdoek	
Lievendj	Wasgoed	
Ein ploog	Een ploeg (van ploegen) of Een team	De aoj veterane
Vore	Voeren	Kinderen eten geven
Ein voor	Gleuf bij het ploegen	
Ein ûsterke	Rozenkrans	
Ein bôks	Een broek	
Vluughaor	Donshaar bij baby's	Plaatselijke haargroei bij jong meisje
Eine dûrpel	Een dorpel	
Ein Sjraom	Een schram, kras	Een dikke fout
Ein veuring	Een voering (in kleren)	
Eine wès	Ein pluk gras, etc.	Plaatselijke haargroei bij vrouwen.
Krumpe	Krimpen	
Sjappelik	Schappelijk	Een lik van dikke Sjang


advertensie

Hùbtj-gae geine
talenknobbelCusters
Taaladviezen
heet dae waal

Zitj-gae met de henj inne haor ?



Gaotj den nao SCISSORS & CO



Klotergeldj



Ein krukèr

Vluughaor
(goot kieke)

Ein mupke:

'Wiej ich gisteraovundj toes kwoom dacht-ich effe det Truus mèt eine wiltjvreemdje kaerel in béd laag.'
'Waas-det den neet zoeë?' 'Nae, ut waas eine bekindje van ôs!'

Kirmis

Drie Jeroene die in ut iêrste voetballe ginge mèt de kirmis duchtig op stap. Wie der Bie Siem gein mins mieër inne tent waas ginge-ze nao Marlies. Einmaal ter hueëgdje vanne slechter aangekômme zoge-ze dao get wûrstjes as reklaam inne vitrine ligge. 'Zôn dink hûb-ich auch' zegt Jeroen B. (geine broor van Sjaak). 'Det zal', zagte de Jeroene C. In koeër, 'mer toch neet zoeë groeët' 'Det zal ich uch laote kieke' zegt-ter mèt dûbbele tóng, en hae deej-zich allebei de bôkse ômlieëg. Waat dao hing kwaam inderdaad neet euverein mèt die dinger vanne slechter. Jeroen C (1) woeëj waal ins maete met Jeroen B. En maakdje de bôkse los. Op det moment kwaam Anja aangelaupen en vreugtj 'waat zeetj-gae aan ut doon?' 'Jè' zeet Jeroen B. 'ich gaef-hum de vrieheid want ich hûb dae knômmel toch neet nueëdi'g!' Die anger twee Jeroene deje ôngertússe mèt eine roeëje kop gauw de bôks toe. Jeroen C (1), dae ut meiste bie zien positieve waas kiektj nao det dink van Jeroen B. En zeet 'hei Jeroen, vanaaf det Anja hie steit begintj det dink van dich steeds mieër op die wûrstjes vanne slechter te lieke... Mer good det Anja get gewintj is en gein aangifte deej van potloeëdvente!



nou nou ...



Auto 2

Twan Brummans woeëj nao op ein gegaeve moment de voetbaltraining. Mer ômdet de deur vanne auto bevrore waas kroop hae via de achterdeur nao binne. Bie ut voetbalveldj aangekômme kan hae neet oet dae auto want de deur aan ziene kantj waas nog neet los gedoeëdj.

'Den auch mer weer door de achterdeur droet', dacht Twan. Mer det ging neet want ut kinjersloot zaat-der nog op. Toen is Twan mer door ut raam nao boete gekrope.



Eine baer inne speike


Alex haaj eine baer gevange op ut fieëst vanne vastelaovondjmedewerkers. Mèt heives gaon kwaam dae baer tússe ut achterraad van Maud heure fiets (kan auch dae van Jet zeen gewaestj). Door Maud heur snelle reaksie (ze haaj allein energie-drenkskes gedronke) vlogte ze net neet euver de kop. Wae weite neet hoe Alex Maud daoveur bedanktj heet. Of zôj-der Maud oetgesjete hûbbe ômdet ze zoeë kortbie reej?

Kinjer 2

Jelle môst van Thea nao buurvrouw Antje (van Claessens) haer ôm allesbinjer te lieëne. Antje begreep der niks van: 'allesbinjer? is-det neet get veur oppe fiets?', vroeg-ze zich aaf. Ze woeëj toch gaer helpe en zeet tege Jelle 'Hool-mich Sanne ins'. Mer opins zeet Jelle, 'jao mer det is get veur bie ut aete!'. 'Ooohh, jao mer noe weit-ich waat dich bedoelst', zegt Antje, 'vreuger heet det maizena!'.


Vergissing

Kamp Wielke (Wiel Smeets) waerdje 85 jaor, det waas dus reje veur ein fieëst. Boete zien eige kinjer en verdere familie waerdje alle bewoeëners vanne flat Niesgoet ginueëdj. Ut fieëst waas bie De Prairie en begos mèt ein aetentje inne vorm van ein buffet. Toen ederein ziene teijer volgesjûptj haaj en aanne taofel zaat te aete kwaam Jack Dirkse binne. Zônger rônjd te kieke hông-der ziene jas aanne kapstok, pakdje zich auch eine teijer en leep richting buffet. Eine vanne aanwezige haaj innegang door det dao iets neet klopdje en leep nao Jack haer. Zie wist namelik det daezelfdje aovondj auch ein fieëst waas bie lemmenhof vanne buurt Kunnekoel. 'Jack, ich dink des-tich op ut verkieërdje fieëst bèst. Dich most bie Lemmenhof zeen,' zagte dae attente fieëstganger. Sônger al te veul weurd zat Jack ziene teijer trûk, pakdje ziene jas en verdween richting Lemmenhof. Vergisse is minselik motte wae mer dinke.



Kinjer 1

Guus van Mart en Esther haaj eine noewe bril gekrege. Neteurlik môst Eric van Frank en Ans dao auch effe door kieke. Toen zeet Eric, 'Guus dae heet gooj auge want ich kan door dae bril niks zeen!'



advertensie

Schoonheidsspecialiste

Mariet
van Enckevort-Janssen



As gae der nog knapper oet wiltj zeen.

Baumkwekerie Moors



Auch veur eine
kômpleëte
tuinaanplantj.



Ein fleske wien, ein kretje
beer of ein anger
drenkske veur toes

Bacchus heet
vanalles in hoës

Veur al eur loeënwerk,
snel, good en neet deur



Dao hûbbe-wae Harrie v/d Looy toch veur

Wisj-djer al ...


- det Siem de lêste tied last heet vanne veut
- det hae meindj det det vanne laminaat kumptj
- det Jos en Chantal ein hoës hûbbe gekochtj in Thoeër
- det ze neet kinne winne in Éll
- det Miny Goldenbeld inne vijver waas gevalle mèt zuver make
- mer det ze der auch weer zoeë oet waas
- det wienpreuve waas bie de vroewebôndj, sorry, bie ZijA ctief
- det Netty van Bongers auch dao waas mèt de auto want ze drinktj allein mer jus d'orange
- det ze toch effe van de wien preufdje en nog eine kieër preufdje
- det ze nao ein paar glaeskes zagt 'ich wil gein alcoholiste waere en auch gein hoor!'
- det ze van det iêerste neet mieër zoeë zeker waas
- det Stefan en Anita op advies van Twan nao eine sjoeëne dieretuin ginge in Düsseldorf
- det ze dao eine halve daag rôndj gereje haje mer geine dieretuin koste vinje
- det later bleek det ze nao Duisburg haje môtte rieje
- det as se eine groeëte hoeëge auto hûbst en ein klein vrouw, den ein opstepke nueëdig hûbst as de roete bevrore zeen

Veuruit, ein glaeske den ...



Bekeuring 2

Sjra van Stiene waas bie Nicole inne loeëds aan ut pôngele gewaestj. Hae haaj gezeen det de plies aan ut controlere waas oppe hoeëgstraot. Later oppe daag reej Sjra nao Hunsel get hole mer waas dae plies al vergaete. Prômpt waerdje hae geflitsjt ômdet ter te hel reej. Oppe trûkweeg dacht Sjra 'noe riej ich aanne angere kantj vanne weeg, den kinne-ze mich neet pakke.' Mer dae truuk lûkdje neet want hae waerdje nog ins gekniptj.



Jeugdbôntjemiddig

De twieëdje jeugdbôntjemiddig waas weer ein geweldig sukses. Eine volle zaal, 20 stûkskes, 74 kinjer van 6 tót 16 jaor, gooj danjes en play-backs, leuke sketches, eine geweldig buut, 2 presentatoren die wiste wat presentere waas, perfekt licht en geluid en ein gooj organisatie. Eederein die heet mêtgewirkt, van de artieste tót en mèt de opbouwers en de schmink, allemaal herstikke bedanktj veur eine geslaagdje middig.



Pappegeij


Veurig jaor sjreve wae det stûkske euver dae pappegeij van Thea. Dae vogel haaj gevraagd 'môs-se koffie?' aan eine vertegewoordiger vanne KNVB wie dae op bezeug kwaam same mèt twieë bestuursleje vanne voetbalclub. Dae goje mins dacht det Thea hum det vroeg en zagt 'ja graag, mevrouw'. Toen dae vertegewoordiger wêg waas waerdje dao nateurlik flink ôm gelache.

Jos van Lemme zaag dae menieër later weer eine kieër bie ein anger gelegenheid en verteldje dae mins det det veurval inne karnavalskrant (De Kwakel dus) waas gesjreve. Gelûkkig kos hae der auch hertelik mèt lache mer hae zagt auch 'Ik hoop dat ik niet in teveel krantjes kom te staan'. Wie Dick Goldenbeld det hueërdje zagt hae 'nou, in Ell sting det in alle 450 krentjes!'

Môs-se koffie?



Ut Kamereudje



Hub van Luute is onlangs in Wieërt ongersjei-je mèt ut Kamereudje, ein ongersjei-jing vanne Rogstaekers die mer eine kieër per jaor weurdj oetgereiktj aan dae-gene, dae zich achter de sjerme inzèt veur de Wieërter vastelaovundj. Ut is de iêerste kieër det dees ongersjei-jing nao eemes geit van boete Wieërt. Hub, prefisiat. Dich hûbs hum verdeentj!



advertensie

**MAKELAARDIJ
VAN LIESHOUT**



As gae de koeëj wiltj verkaupe,
of as gae ein anger optrêkske zeuktj.

advertensie

Wiltj-gae
noew tegelkes
aanne moor? En gae
kintj det zelf neet doon?



Den nao Peter v.d. Eertwegh.

advertensie

KEPPER

Clown
Goocheliëer
Artiest
Fratsemaker
En nog veul mieër



advertensie

LAST VANNE VEUT ?

Den snel nao
pedicure
Toos Mennen



advertensie



mook

motoronderdelen

advertensie

STERK IN STAAL



DERCKX STAALBOUW

Ein fieëst.



Eder jaor organizere de mètworkers vanne Éller vastelaovondj ein fieëst veur zichzelf. Aanne veuraovondj van ut noewe seizoen bringjt ein committee alle minse oppe bein die ut aafgeloupe seizoen op welke meneer den auch ein biedrage geleverdj hùbbe. Ut organiserendj committee waas deze kieër De Bassen van Avanti en ut FAC same. Ut fieëst sting in ut teiken van Country & Western en as lokasie waas De Prairie gekoze, hoe kan-ut anges. Rôndj zeve oor verzameldje zich dao alle Billy the Kid's, Buffalo Bill's, Old Shatterhand's, Winnetou's, Pocahonta's, Calamity Jane's en anger cowboys en voetvolk. Ma Dalton en Laura Ingalls wore trauwes auch dao. Frank en opperhoofd Jan Chieff zwingeldje de aovondj aan mèt get oetlèk van ut ein en anger. Ieërst môst ederein nog get biegeschminktj waere ôm ut nog echter te laote lieke. De bedoeling waas nateurlik ôm gezellig bie-ein te zeen mer dao môste auch get opdrachte oetgeveurdj waere tiejes eine rôndjgank door ut tûrp ... sorry, euver de prairie! 8 Groepe ginge ein veur ein op paad en boete anne deur bie De Prairie waas al de ieërste opdracht: eine wigwam bauwe. Gelukkig haaje Wiel en Dick det good veurbereidj want de groepe hoofdje allein nog mer ut zeil good vast te make en te besjildere veur de puntje. Ut is neet te besjrieve wat allemaal op det dook kwaam te staon mer de meiste kregte ut klaor ôm toch ut thema van deze aovondj vast te laegge. Mèt dae wigwam oppe rûk ging de route nao ut tunnelke bie de dokterspraktijk. Dao probeerdje Miny en Anny de deilnummers oet te laegge wie ze mèt ein lasso ôm eine paol môste goeëje. Det lûkdje sômmige braaf good. Mer dao wore der auch bie die gelûk hùbbe gatj det se zich neet ter plekke per ôngelûk opgehangen hùbbe. Hienao ging de tocht langs de kirkhûf verder richting speulveldj in Meuleveldj 2. Dao wachdje Lins en Truus al oppe volgendje groep ôm út hooftezerwerpe oet te laegge. Ut pûlke rake waas meestal gein probleem, mer ôm te zûrge det det hooftezer ôm det pûlke bleef ligge waardje al snel tot kunst verheve. Gelukkig haje ein paar de truuk snel door en waardje auch bie dit spel de nueëdige puntje gescoordj. Toen snel verder nao ut hoes van Thijs en Toos anne Antoniusstraot. Dao waas de opdracht ôm snel eine paerdskep te teikene op kartôn, deze oet te knippe en te bevestige op eine paol. Toos heel ôngertússe de minse get anne kal en Thijs laedje op det zien graasj opgeruumdj bleef en de opdracht netjes oetgeveurdj waardje. Auch dit waas weer good veurbereidj en zoeëdoondje woor-se weer gauw op paad richting Het Kleine Huis op De Prairie. Sômmige haje teveul dorst gekrege ôm in eine kieër door te laupe en ginge ieërst Bie Siem get drinke. Toen alle groepe trûk wore môst nog ein opdracht gedaon waere. Eder groep môst ut leedje gaon zinge det op ein aafgesproke melodie zelf waas gesjreve. Daobie ging ut opperhoofd van edere groep op ein paerd (houte bôk) mèt zaal zitte en waardje door de angere vanne groep rôndôm ut kampveur gedrage. Auch dit waas weer fantasties veurbereidj en dao waardje veul gelache met det gesjûrg enne leedjes. Dao waas veul strid tússe de groepe en ômdet de gemoedere get hoeëg oplepe môst same mèt opper-opperhoofd Jan Chieff de vreespiep gerauktj waere. Gae haatj môtte zeen wie alle cowboys en cowboyinne oppe grôndj zote rôndjôm ut kampveur en veur de wigwams. De vreespiep ging van moel tot moel, ut kampveur raukdje nog get nao, de zôn zakdje achter de horizon en de aovondj leep langzaam op zien inj. De Country & Western klanke van Frank en Evert klonke wêg euver de heuvels. Weem oeteindelik gewonne heet kan bienao nemes mieër zêgge, mer det ut eine geweldige aovondj waas, det zeet ederein.



advertensie

OASIS
BLOEM - KUNST - KADO



Veur as gae
eemes anges
of uchzelf
wiltj verrasse

advertensie



Veur good
tummerwerk meuktj
Koos Winkelmolen
zich sterk



advertensie

Hùbtj-gae
kabelwerk ?
Den is
van Geleuken sterk.



Oetsleeg Vastelaovesoptocht 2003 van CV De Moerebuuk




1e pries + wisselbeker mèt 67,5 puntj.
(Auch 1e pries klein groepe)
"In de bluuj van ut laeve"
Van; Annie Huyskens, Mini Goldenbeld
en Toos Peeters



1e pries vanne wages mèt 67 puntje.
"Mèt dees daag dreije de kafees"
Van; De Brandjblussers



1e pries groeëte groepe mèt 64 puntje.
"De iëerste oerminse"
Van; Buurt Spargelheukske.



1e pries
alleingangers
64
puntje.
"Ich kôm der
zoeë aan"
Van; Huub van
Luute.



Van ôze verslaaggaveer Kaja.



Leefke?
Wêse miene naam
auch al neet mieër?

advertensie

SPAR - Leon Derksen

Veur alle
dagelikse
boeëdsjappe



Veur appele en paere
Gaatj, nao Moois-Franssen



vers vanne baum

Kinjer 3

De wichter vanne lieëger sjoeël haje eine wanjeltocht door ut brook dae door ein paar aojers oetgezatte waas. Vol goje mood ginge-ze op stap ônger begeleiding van lieërare en ein paar aojers. Dao waerdje veur ettelikke kilemaeters flink de zûk der in gezatte. Ze vônje-ut allemaal aeve sjoeën en de oetlèk aeve intresant. Toen ze achter ut hoes vanne familie Takken aankwome waerdje-ze geweze op dae hoeëge paol mèt det vogelkestje bove-op. Normaal is det bedoeltj det roofvogels of ule dao in kinne nêstele. Mer Caroline van Rob en Resian wist nog ein reje woeërôm det dink dao steit. 'Kiek, dao steit eine flitspaol!' haaj-ze gezagt.



advertensie

Zeuktj gae ein struukse, ein buimke of ein plentje veur in de tuin of achter de lamelle



Den motj gae zeker ins bie
Linders aanbelle

HENDRIKX-VAN GEMERT



BESTRAOTINGE

Mèt eine caravan droet;
waer of gein waer?
Den môjt-gae nao
Lantinga haer.



Auch veur eine camper

VAKLAN

Auto 3

Jan, de aodste zoon van Helma en Theu Sentjens, ging op aodjaorsdaag nog effe ein boeëdsjap doon in Wieërt. Hae haaj inne gezèt gelaeze det ze mèt de nachtmès in Wieërt flink boetes haje gesjreve veur foutparkeerders. Jan dacht 'ich riskeer niks, ich goeëj mer genôg in dae maeter, det kloetj mich neet.' Toen hae trûk kwaam vanne winkel waas zien verbazing mer veural zien verontwaardiging groeët toen hae 2 parkieërwachters bie ziene auto zaag staon sjrieve. Jan reet zich toen waal op en zagt zoeë ôngevieër 'det kan neet det ich ein bôn krieg, ich hûb mieër as zat betaaltj aan parkieërgeltj !!!' 'Mer menieër, nou dootj ins rûstig, misschien heije ut bunke per ôngelûk in eur tes gedouwjt', susdje ein van die parkieërwachters hum. Jan wist zeker detter ut bunke veur de raam haaj gelagtj en kontroleerdje dit door nog mer ins inne auto te kieke. Mer wieder door ut raam nao binne keek dacht-ter 'waat liktj-ter toch eine rotzooj in miene wage, wie kan det toch?' Toen waas ut misterie zoeë opgelostj. Wieder namelik nog ins tegooj keek zaag-ter naeve dae bewusdje auto nog eine staon, precies dezeldje!! Dae angere auto waas sjoeën opgeruumdj en haaj netjes ein bunke achter ut raam. Det waas dus ziene eige auto!!




Wie ein kat eine haas vingtj.

Jos reej tege middernacht nao ein vergadering in Noord Limburg same mèt eine collega heives. Opins reuptj dae vrouwelikke collega 'stop, eine hōndj!' .. Knoets .. Te laat !! ... Jos vreugtj 'lûst dich haas?' 'Nae, bring mich mer gauw heives' Zoeë gezagd, zoeë gedaon. Mer Jos vōnj ut toch jaomer òm dae haas (ut waas haost Kerstmis) dao te laote ligge en reej trûk. Ut waas eine good aafgerichdje haas want hae laag nog oppe zelfdje plek te wachte. Kofferbak ope, haas derin en richting Ell. Jos, geine heldj in slachte, dinktj 'ich bring hum nao òs moder, die slachtj dae waal veur mich. Ut waas òngertûsse half ein snachs en òm moder neet wakker te make lagter dae haas ane achterdeur nieër. Smûrges veur det Jos òm 8 oor nao ut werk ging reej-der bie moder langs veur oetlèk te gaeve. Moder zaat al achter de gezèt en Jos vreugtj 'hûb-djer hum gevōnje?' 'Waat?' 'Dae haas moder!' 'Mer jōng, ich hûb geine haas gezeen!' Same gaon-ze boete kieke mer dao laag inderdaad geine haas. Ze




snaptje-der allebei niks van. Jos ging nao zien werk en moder ging weer inne gezèt laeze. Mer ze stook ièrst ein kaerske op veur St. Teunis (de patroëneheilige veur verlore gegange veurwerpe en aangereje wiltj). Wiej ze de gezèt oet haaj leep-ze nao boete en zaag inne mooshoof ein kat ònger de hêk zitte. Ze luptj der haer en zuut innegang 2 pueët ònger get blajer oet staeke. 'Dae haas' dinktj-ze. Ze sluiptj nog get korterbie en duiktj mèt ein snelheid van emes van 90 jaor bove oppe kat enne haas. Hûbbes! Ze lûptj nao binne, bleustj de kaers oet en begintj te slachte. Ein dink is òs nog neet dudelik. Heet Jos noe mèt Kerstmis haas of kat gaete? ...



Optochtnoets

Veur de optocht van 2004 heet ut bestuur mèt de leje vanne Raod van 11 bekeke of wae get kōnne doon aan ut priezegeldj veur de deilnummers aanne optocht. Nateurlik is ein fieëst as vastelaovundj neet bedoeldj veur ut geldj, mer wae hûbbe al jaore eine herstikke goje optocht met goj iedeje en (waat de Eller biedrage betreft) prima aafwerking. En sjuust die aafwerking kostj nateurlik geldj. Veur al noe steeds mieër jeugd mètluiptj, vinje wae det ein aanmoediging in de vorm van eine groeëtere priezepot op zien plaats is. Allein: woeë hole wae det geldj vanaaf? Mōtte-wae òs plaatselijke òngernummers aan de jas trekke? Die toch al altied as ièrste gevraagdj

waere òm te lappe? Of kōnne wae ut zoeë doon wie ut op anger plaatse geregeldj is: ein biedrage vraoge van ut publiek det steit te genete? Wae hûbbe veur 2004 gekoze veur ut tweekde veurstel. Ut Optochtcomité zal zich dereuver buige en ein maneer oetdinke wie wae geldj gecollecteerdj kriege. Ein opmerking: dae mètluiptj mèt de optocht hooftj nateurlik niks bie te drage, dus



priezepot

advertensie

De mik, de brueëdjies, de vlaai,
alles is dao zoeë lekker

Nateurlik bie Thijs,
òze warme bekker



Kriegtj-gae ònverwachs
bezeuk oet allerlei heuk?

Lemmenhof

kampere en logere,
bringtj oetkōmst

Bekeuring 3

Huub van Sentjes geit altied in Grathem nao de kapper want dae sjriefjt zich Zentjens. Oppe trûkweeg steit de plies in Kelpete controlere en kriegtj Huub ein bōn. Later bleek det hae oppe haerweeg auch ein bōn haaj gekrege. Mer det waas hum neet opgevalle òmdet zien haor te lank wore nateurlik. Huub is dae daag dus 3 kieër gekniptj gewore.



Familie biljare

De biljaarclub vanne Prairie mōst speule tege Linne. Det waas tege 2 vaders en heur 2 zeuns. Wie ze trûk kwome zeet Paul 'Leike mōst tege einē naef en ich tege die nicht ..'

advertensie



Gein gèldj mieër
inne tes mèt dees daag.
Laup den mer bie
de Rabobank nao binne.
Want dao kins-se
daag en nacht pinne.

Gaotj-der ins get dèkker op oet
Beveurbieëldj nao
De Bachelorclub
ofwaal
Bie Siem



Elltaria



gewueën de lekkerste friet en snacks
auch veur complieëte sjōttels

De Kwakel

Ein gooj rits



Aafgelaupe zomer zote De Classics vanwege ein groeët sjüttersfieëst in Swartbrook in ein tent. Ut waas bloodheit en dus waardje beslote òm der mèt de fiets haer te gaon. Zoeë gezagdj, zoeë gedaon. Half Éll waas dao, auch Jolanda, Wil, Jan en Elly. Ut waas gezellig druk en dao waardje gedanstj en gedronke. Mer oeteindelik môst-ter auch aaf en toe ins nao de wc gegange waere. Det haaj de hieële aovundj good gegange tot op ein gegaeve moment Jolanda en Elly veur de zoeëveulste kieër weer same ginge pisse en Jolanda mer neet nao boete kwaam. Ut doordje en doordje. Toen eindelijk die deur ope ging en Jolanda nao boete keek zag-se 'ich bèn neet gewaestj, ich krieg mien rits mèt gein meugelikheid ope!!' 'Waat noe gedaon,' zeet Elly. Jolanda meindje ut nog waal effe vol te haoje, mer einmaol trûk inne tent gekomme en nog mer eine pils gedronke te hûbbe waardje-ut heur toch te erg. Intûsse haaj zoeëget ederein al ins geprobeerdj òm die rits los te kriege, mer ut lûkdje gein mins. Zoeë-as waal dèkker ut geval is haaj Jan waal ein oplossing 'mer den kan die rits neet mieër toe,' zag hae. 'Jao,' zeet Jolanda 'den zölle wae waal heives motte gaon, dit haoj-ich neet lang mieër vol.' Toen zeen-ze toch mèt zien vere nao de fiets gelaupe (ut waas tenslotte kort bie ein oor) en dao heet Jan mèt zien kniep die rits kepot gesneje. Jolanda wist neet wie snel det-se inne struuk most kômme. 'Ich bèn nog noeëts zoeë opgelûchtj gewaestj' zag-se wie se trûk kwaam. Daonao zeen-ze mèt de fiets nao Éll gegange, heet Jolanda zich ein anger bôks aantrokke en hûbbe-ze ut toch nog laat gemaaktj bie De Prairie.



Ich môt plasse



Programma Vastelaovundj 2004 De Moerebuuk

(Sjriefft dit mer alvast oppe klender.
Veur hoe laat en zoeë môt gae ut Kontaktblad etc. inne gate haoje)

Zaoterdig	24 jannewarie : Resepsie noewe Prins Moerebuuk
Zinbig	25 jannewarie 1 Febr. : Kaartverkoop Bôntje Aovundj
Dinsdig	27 jannewarie : Oefene Bôntje Aovundj
Dônderdig	29 jannewarie : Oefene Bôntje Aovundj
Maondig	2 febrewarie : Oefene Bôntje Aovundj
Dinsdig	3 febrewarie : Oefene Bôntje Aovundj
Dônderdig	5 febrewarie : Generale repetesie Bôntje Aovundj
Vriedig	6 febrewarie : Bôntje Aovundj
Zaoterdig	7 febrewarie : Bôntje Aovundj
Zunbig	8 febrewarie : Bôntje Senioremiddig
Zunbig	15 febrewarie : Resepsie Spoëkejaegers Swartbroek
Vriedig	20 febrewarie : Kinjermiddig vanne sjoeël
Zaoterdig	21 febrewarie : Sleuteleuverdracht
Zunbig	22 febrewarie : Heilige Mès en Jubileum Vorst Jan
Maondig	23 febrewarie : Vastelaovundj maondig = OPTOCHT !
Dinsdig	24 febrewarie : Vastelaovundj dinsdig Sloete !

Alvast veul plezeer!

WAOR GEBEURTJ

Jantje vreugtj aan Sylvia 'wulst-tich auch de yoghurt op ut boeëdsjappeliestje sjrieve?' Vreugtj Sylvia 'wie sjriefs-se yoghurt?' 'Och' zeet Jantje, 'sjrief mer pudding op!'

Ein mupke

'Pappa, woeërom bès-se eigelik mèt mam getroudj?' vreugtj ein kintj. Zeet pap tege mam 'zuus-se noe waal, zelfs ein kindj kan det neet begriepel!'

advertensie

Inne kasse van Coolen
Kin-djer kômkomers hôle



Veur ein plentje veur inne
mooshoof of ein bleumke
oppe tied.
Nao Verhaag haer
is ut neet wiet.



auch al steit met dees daag alles oppe kop
mienne service steit altied veurop !!!

Teniseeltechniek
Hub van Luute

advertensie



Veur vrachtwages die ein noew
gezicht wille hùbbe


truck color design

Praktijk veur
Klassieke Homeopathie
bie Dianne Lamers



As gae op ein anger
meneer gezondj wiltj waere

Ut gebit




Marlies vônj smûrges bie ut poetse vanne café ein gebit. Ut waas waarsjienlik van eine klantj oet Wieërt. Want dae haaj saoves teveur behueërliek get gedronke en haaj Marlies ut beer weer trûk gegaeve oppe wc. Waarsjienlik heet-ter daobie neet gemerktj det hum zien gebit oetfloepdje. Ut gebit waerdje in ein tuutje gedaon en achter ut befet gelachtj want Jan kumtj regelmaotig aan en de iëerstvolgendje kieër zôj hae derwaal ôm vraoge. Mer Jan leet lang op zich wachte en ut gebit verhoesdje regelmaotig van plaats. Nao ein waek of 3 kumtj Marlies kokhalzendj de keuke in mèt ut gebit en zeet tege Paul 'goeëj-ut noe mer wèg det lieëlik vies dink.' Woeë-op heur dochter van 5 zeet 'hûb-se ut den inne môtj gatj?'



Wisj-der al

- Marlies waas nogal heis gewore nao zien 12½ jaorig jubileum
- det-se tweeë daag neet heet kônne kalle
- det det volges Paul gerûstj get langer haaj moge dore
- Paul op ein gegaeve moment tege Zef haaj gezagd 'ich gaon nao Amerika op verkansie'
- det Zef haaj gezagd 'asse diene auto den mer in Ell lieëtst, den is-ut good'
- det Chris Breukers op ein gegaeve moment snachs op de Breybaan tûsse Zwarbroek en Wieërt de weeg kwiet waas
- det-ter toen mer bie ein sjaop inne wei is gaon slaope tot smûrges half 11
- det gae waal kintj zeen det ut ein soort ut anger opzeuktj as-se mer zaat genôg best
- det Remco op ein gegaeve moment nao eine nacht stappe de kerstbaum water ging gaeve en de bel oppe tek lagt
- det-ter neet inne gate haaj det det eine kunstbaum waas
- det ut waerstation echt bie de kern Haler hueërtj en neet bie Éll
- det det neet geuftj, Éll heet de Lentekrans en dao kumtj mieër meziek oet
- det de buurt De Pannestert ut leedjesconcour haaj gewônne de lêste kieër
- det Siem ut gek vônj det Thijs waal gevraagdj waas ôm mèt te zinge en hae zelf mèt zien zangtalent neet
- det bie Carla en Jan ingebroke waas en det Jan zich dae inbraeker gesnaatj haaj
- det-ze saoves, wie ze zich oppe bank aan ut bekômme wore, door May van Jos opgebeldj waerdje euver wie versjrikkelik det allemaol waas
- det May auch innegang bezûrgdj gevraagdj haaj of die vrieaertjes veur de Bôntje Aovendj der nog wore

Mer wae zinge ein
tueënke hoeëger ...



Moeërebuuk en Moeërinne



Waat ein fantasies jaor waas det. Vanaaf ut allerieërste begin tot en mèt de sloeting oppe dinsdig. Ut waas allemaol ein groeët fieëst en ein groeëte belaevenis. Ut zeen der neet veul gewaestj die neet mètgedaon hùbbe en aanne kantj zeen blieve zitte. Bienao ederein heet mèt mich mètgesurfdj door ut Moeërelandj. En det den zoeëveul jeugd oppe bein is, det is allein mer good veur de toekômst. Dit waas ein jaor wat ich noeëts zal vergaete ômdet ut hieële gebeure eine onoetwisbare indrûk op mich heet gemaaktj. En dao wil ich uch allemaol veur bedanke. Mien adjudante Rob en Ard veur de geweldjige ôngersteuning, Angelique die altied klaor sting, de vasteloavesvereniging en de Raod van Elf veur de prima inzèt, de optochtengers en Bôntje Aovundj-artieste veur de creativiteit en ut entousiasme, de muzikanten veur eine echte muzikale vastelaovundj, de familie veur ut mètlaeve en mètdoon, en alle moeërebuuk en moeërinne veur det echte Eller vasteloavesgeveul. Allemaol names mich en mien adjudante BEDANKTJ. Ich wil den auch vanaaf dees plaats miene opvolger alles toewinse waat ich auch hûb ôngervônje. De vastelaovundj in Ell laeftj en den is ut veur eine prins altied ein geslaagd jaor. En blijftj auch dit jaor neet zitte aanne kantj, mer surftj mèt ôze noewe prins door ut Moeërelandj. Alaaf!

Prins Huub IV
Adjudante Rob en Ard





Woeërôm lachtj Siem?

- A Ut is dinsdig, hae is geslote.
- B Ut is maondjig, hae is geslote.
- C Hae lachtj ôm zien eige grap
- D Hae steit ûrges anges aanne tap

Schnabbeltjes

Gevonje inne riolering inne buurt vanne Broekweg: ein stûk marmer van ein trap.

Gratis aaf te hoole: ein flès port. Dao is pas ein glaas oet.



Weurdje vanne redaksie

Veur dees oetgave haaj de redaksie get minder personeël. Corrie en Hub ginge nao de angere kantj vanne wereldj ôm te genete van ein lang verkansie. Thea ging heur later achternao. Mer mèt hulp van ôs noew redaksielid Tjeu is ut toch weer good gekômme. Allerbelangriekste is dae steun van uch. Eure inbring waas weer geweldjig. Gaotj zoeë door!

De Kwakel is ein oetgave van ut Kwakelcomité;

Thea van Beurskes, Jeanny vanne Kaolder, Jean Bankers, Hub vanne Baars, Tjeu van Lemme en Paul van Miet vanne Bekker

Vormgaeving;

Huub van Sentjens en Paul van Miet vanne Bekker



Ein paar mieërkeuzevraage.

(Mer ... woeërôm sooj Siem toch zoeë poppelaer zeen?)



Woeërôm haaj Siem mèt de kirmis ein tent boete aanne café staon?



- A Det waas ôm ziene noewe auto in te stalle
- B Dao woeëj de volleybalclub ein garderobe in beginne
- C Hae woeëj dao Marlies de uich mèt oetstaeke
- D Dèt waas bedoeltj as fietsestalling veur zien klantje
- E Hae verwachdje veul volk mèt de kirmis
- F Den kôste de klantje mèt good waer boete staon (Mer mèt good waer geis-se boete staon en neet in ein tent. Mèt slecht waer geis-se binne inne kroeg staon en neet boete in ein kaoj tent)
- G Hae wist ut zelf neet
- H Hae verwachdje veul kinjer-buggies mèt de kirmis
- I Den sting ut heitelochtkanôn drueëg
- J Det waas ôm ut die vanne voetbalclub get lestiger te make ôm ut bord te laeze



Bie dees foto;

- A Weem weurdj hie begrave?
- B Is dit ut Éller rugby team of de tuindersvereniging
- C Nao welke hook lûptj de biljaar aaf
- D Weem steit ônger de baggelamp
- E Ging toen auch alles euver de roeëje?
- F Haje dees minse dezelfdje kapper?



advertensie

SLAGERIJ RUUD EN MARLEEN HEIJKERS

Vers vleis
Kant-en-klaar gerechte
Barbecues
En nog veul mieër

advertensie

Hûbtj-gae last
van eur spiere
in de bein of inne nek.
Den is Beekman-Verleg
de juuste plek.



Proklamasie van
Jeugdprins Lex en Jeugdprinses Wendy

*Ich, prins Lex en ich ,prinses Wendy,
 verklaore aan uch allemaal:*

*Ich, Prins Lex,
 Zoon van Leon van Toon van Aeredrees
 En Anneke van Dick en Miny
 Kleinzoon van de 50^{te} prins vanne Moerebuuk*

*Ich woeën inne buurt Hoverwei
 Oppe Magnoliastroat
 Saame met pap en mam
 En mien breurke Cas en zusje Loïs*

*Drumme is mien lust en mien laeve
 Dao kan ich mich hieël aan gaeve
 Games speule aanne compjuter en oppe tennisbaan
 Auch dao waag ich mich aan*



*Ich, Prinses Wendy,
 dochter van Sjef van Drieka en Lowie
 van Sjef zonne Hannes
 en Toos van To en Rinus*

*Ich woeën inne buurt den Dreihook
 op Kaolderhof
 saame met pap
 en mien breurke Ruud*

*Bette met mien vriendinne
 vinj ich hieël erg fijn
 en iets met knutsele verzinne
 van hieël groot tot hieël erg klein*

*Wae zitte saame in groep acht
 Oppe Verrekijker, det haajdjer waal gedacht
 De meisters húbbe aan oos de henj hieël vol,
 Mer zeen op ziene tieëd auch waal in veur get lol*

*Voetballe doon wae saame inne D
 Ôze club is R K E S V
 Douche môtte wae waal apaart
 Anges kriege wae de rooi kaart*

*Allebei haoje wae van muziek
 Hossen en housen vinje wae hartstikke sjiek
 Saame met Hanneke en Bo, oos adjudante
 Kumptj de muziek van alle kantje*

En det doon wae onger ôs motto:



*Laotj de muziek dit jaor mer knalle
 Want wae gaon flink fieëste mèt z'n alle!!*





Wae winse uch
eine plezeerige
vastelaovundj!